

Kaore te aroha e komingomingo nei,
 Te hoki noa atu i tarawahi awa.
 Tenei¹² ka tata mai te uhi a Mataora.
 He kore tohunga mana, hei wehe ki te wai,
 Kia hemo ake ai te aroha i ahau.
 He kore no Tukirau¹³ kihai ra i waiho
 He whakawehi, e, mo te hanga i raro nei.
 Nou nga turituri pawera rawa au;
 Taku turanga ake i te hihī o te whare,
 E rumaki tonu ana he wai kei aku kamo.

¹Takoto ai te marino.—Ki W. 5/140 e penei ana, "E hora te marino."

²Haohao-tupuni.—He ingoa waka no Ngati-Maru.

³Wareware.—Ki W. 5/140 he penei "wairangi."

⁴Nge-au.—Ko au, he reo no runga i a Tainui, a e rangona ana i runga i a Te Arawa.

⁵Ahurei.—He rangatira toa no Ngati-Maru. Na Tau Henare, M.P. i korero te haerenga atu o Ahurei me tana ope, ka hoe atu i Hauraki ki Pewhairangi. Ka tae ki te rae i Tapeka, i Kororareka, ka kitea iho e Tara, he rangatira no Ngati-Hine. Ka ui iho tera, "E ahu ana koe ko whea?" Ka whakautua ake, "Ko te awa o Te Kerikeri, ko ko i a Kaingaroa." Ko Kaingaroa he rangatira tonu, engari tera ano te makenu o tona whakapapa. Ka karanga iho a Tara, "Hei." Ehara ra toku hoa a Kaingaroa, he purupuru, he taka; a pa tau ko au ko te titi, ko te aporai, a Tama-purupurumarire, ko Ngati-Rangi, ko te angaanga titi iho i te rangi. E puare nei ra te awa o te rangatira, a Taumarere. "Ka whakama a Ahurei, na tau noa iho i te Rere-i-Haruru. Ka mate i te kai ka patua etahi pa hangahanga noa iho. Kei runga atu o te Rere-i-haruru tetahi awa i peke ai a Ahurei, e kiia nei i tenei ra ko Te Peke-a-Ahurei.

Ko tetahi take tena o te whawhai a Hongi Hika ratau ko Nga-Puhi ki a Ngati-Maru.

⁶Kohi.—Ko te kurae i waho o Whakatane, i te taha rawhiti. He pou whenua karangaranga no tera takutai, e kaha ana te haere i roto i nga waiata.

⁷Whakaari.—Ko te motu e kiia nei ko White Island, he puia.

⁸Ka hora te marino.—Ki te W. 5/140 e penei ana, "ka wehe te marino."

⁹Te pou o te kupenga } Kei te ngaro tenei.
 a Taramainuku }

¹⁰Moehau.—Ko te matarae i waho o Kapanga.

¹¹Hei toko, etc.—Ki te W. 5/140 e penei ana, "Ki te toko pau e ki tawhiti ra, ki te ketunga rimu."

¹²Tenei ka tata mai, etc.—Ki te W. 5/140 e penei ana "Tenei ka taia mai." a i noho penei tenei rarangi ki muri i tera kupu "tarawahi awa." Otira ki te W. 2/35 kei raro rawa iho tenei rarangi, ara ke i whai i muri iho i "tarawahi awa 8 ko era rarangi na

"He kore tohunga mana hei wehe ki te wai
 Kia hemo ake ai te aroha i ahau?"

He pena ano hoki ki M. 38 (Nga Moteatea).

Ko te kaupapa i tuhia nei na Hoani Nahe i hoatu ki a White, ki a Percy-Smith.

E penei ana ki "Nga Moteatea," "Tenei ka tope mai te uhi a Mataora."

¹³Tukirau.—Kei te ngaro tenei.